

Инсондан гўзалроқ ҳеч нарса йўқ!

15:10 / 28.04.2017 2972

Ривоят қилинишича, Исо ибн Мусо аёлини жуда қаттиқ яхши кўрарди. Бир куни аёлига: “Агар ойдан гўзалроқ бўлмасанг, талоқсан” деди. Аёли дарҳол ўрнидан туриб, ҳижоб ўраб олди ва эрига: “Мени талоқ қилиб қўйдингиз” деди. Ўша кеча икковлари ҳам жуда изтиробда тунни ўтказишди.

Тонг отгач эри халифа Мансурнинг хузурига шошилди. Халифанинг олдига боргач: “Эй Мўминлар амири, агар хотиним талоқ бўлган бўлса, бутунлай ғамга ботаман. Усиз яшаганимдан кўра ўлганим яхши” деди. Унинг гапидан Мансур қаттиқ безовталанди ва саройга фақиҳларни чорлаб, улардан бу масалага ойдинлик киритиб беришларини сўради.

Фақиҳларнинг ҳаммаси бир овоздан аёлнинг талоқ бўлганини айтишди. Фақатгина Абу Ҳанифа раҳматуллоҳи алайҳининг шогирдлари бўлган бир фақиҳ жим турарди. Халифа ундан: “Нега жим турибсиз?” деб сўради. Ҳалиги олим: “Меҳрибон ва раҳмли Аллоҳ номи билан (бошлайман). Қасамёд этурман анжир ва зайтун билан, Тури Синин (тоғи) билан, мана шу тинч-осойишта шаҳар (Макка) биланки, ҳақиқатан, Биз инсонни хушбичим ва хушсурат (шаклда) яратдик”. Инсондан гўзалроқ ҳеч нарса йўқ!” деб жавоб берди.

Шунда Мансур Исо ибн Мусога: “Аллоҳ мушкулингни осон қилди. Ҳукм мана шу олим айтганидек бўлади. Бор, аёлинг билан яшайвер” деб буюрди ва унинг аёлига “Эрингга итоат қил, у сени талоқ қилмабди” деб мактуб жўнатди”.

Ҳоний Ҳожининг “Солиҳлар ҳаётидан минг бир қисса”

китобидан **Нозимжон Ҳошимжон** таржимаси